



SIARAN AKHBAR
KEMENTERIAN KEWANGAN DAN EKONOMI

**PENANDATANGANAN MOU ANTARA KEMENTERIAN KEWANGAN DAN
EKONOMI DAN ASTM INTERNATIONAL**

BANDAR SERI BEGAWAN, 20^{hb} MEI 2025

Pusat Standard dan Akreditasi Brunei Darussalam (PSABD) di bawah Kementerian Kewangan dan Ekonomi (MOFE) dan ASTM International secara rasmi telah memperbaharui Memorandum Persefahaman (MoU), menandakan pencapaian penting dalam usaha Negara Brunei Darussalam untuk memacu inovasi, kualiti, dan kemampanan melalui peningkatan standard kebangsaan.

Mewakili Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam bagi penandatanganan adalah YM Dr. Hajah May Fa'ezah binti Haji Ahmad Ariffin, Setiausaha Tetap (Ekonomi, Perdagangan dan Industri) di MOFE selaku Pengerusi Majlis Standard dan Akreditasi Brunei Darussalam (MSABD). Manakala, menandatangani bagi pihak ASTM International ialah Mr. Elvin Chia, Pengarah Outreach Asia.

Turut menghadiri ialah YM Awang Mohammad Harris bin Brigadier General (B) Dato Paduka Haji Ibrahim, Timbalan Setiausaha Tetap (Perdagangan dan Industri) di MOFE selaku Timbalan Pengerusi MSABD, ahli dan wakil ahli kepada MSABD, wakil dari Komiti Standard Kebangsaan, Pegawai-pegawai kanan dari MOFE dan pelbagai agensi kerajaan serta Badan-badan Penilai Pematuhan (CAB).

Penandatanganan MOU ini menandakan usaha Kerjasama antara PSABD dan ASTM International dalam mempertingkatkan infrastruktur kualiti serta penyelarasan Piawai Brunei Darussalam dengan amalan terbaik antarabangsa.

MoU asal yang dimeterai pada tahun 2010 dengan Kementerian Pembangunan memberi tumpuan kepada industri pembinaan. Di bawah panduan MSABD, PSABD kini menerajui usaha penyeragaman standard Brunei dan Perjanjian yang diperbaharui ini mencerminkan skop yang lebih komprehensif bagi menangani keperluan pelbagai sektor, iaitu antaranya sektor tenaga, pembuatan, dan keselamatan awam. Antaralain faedah-faedah yang dapat diperolehi daripada pembaharuan MOU berkenaan adalah akses kepada standard-standard ASTM, keahlian dalam komiti teknikal ASTM dan peluang-peluang pembangunan kapasiti.

Hadir bagi memberikan kata-kata aluan adalah YM Dk Hajah Nadiah Annasyitah Binti Pg DP Haji Abu Bakar, Pemangku Pengarah PSABD di MOFE. Dalam ucapan alu-aluannya, beliau menekankan bahawa MOU tersebut adalah visi bersama dalam memajukan infrastruktur kualiti bagi menyokong pembangunan yang mampan, pertumbuhan ekonomi dan menjaga kebajikan awam. Dalam memupuk kualiti ini, ianya dapat membantu dalam menggunakan dan memanfaatkan kepakaran ASTM International dalam pembangunan piawai, mempertingkatkan kerjasama melalui pembangunan kapasiti dan inisiatif pertukaran teknikal serta menyelaras lagi objektif negara dalam memastikan kesihatan, keselamatan dan perlindungan alam sekitar adalah terjamin. MOU ini menandakan komitmen Negara bagi kemajuan ke arah inovasi dan kemampuan untuk mencapai kecemerlangan dalam ekosistem infrastruktur kualiti. Selain itu, Mr. Elvin Chia, Pengarah Outreach, Asia di ASTM International juga menyatakan sentimen yang sama serta menekankan visi bersama dalam memupuk keterangkuman, kesihatan dan keselamatan awam, kecemerlangan serta meningkatkan kualiti hidup secara menyeluruh melalui penyeragaman.

Melalui kerjasama ini, Negara Brunei Darussalam berhasrat bukan sahaja untuk mempertingkatkan piawai kebangsaannya, malah untuk memperkukuhkan kedudukannya sebagai pemain yang berdaya saing dan berdaya tahan di pasaran global. MOU ini dijangka akan menjadi pemangkin kepada kemajuan, membuka peluang perdagangan baharu, serta menyokong pembangunan mampan jangka panjang sejajar dengan Wawasan Brunei 2035.

-TAMAT-

Disediakan oleh:

Pusat Standard dan Akreditasi Brunei Darussalam (PSABD),
Kementerian Kewangan dan Ekonomi.

E-mel: psabd@mofe.gov.bn

Tarikh: 22 Zulkaedah 1446 / 20 May 2025